



საქართველოს გაერთიანებული სახელმწიფოს და სოფლის მეურნეობის მინისტრი

ბრძანება N 2-180

26/02/2020

ქ. თბილისი

ქ. რუსთავში, შპს „ჰაიდელბერგცემენტ ჯორჯიას“ რუსთავის ცემენტის საწარმოს ექსპლუატაციის პირობების ცვლილების (N1 ღუმელის დემონტაჟი) პროექტზე სკრინინგის გადაწყვეტილების შესახებ

შპს „ჰაიდელბერგცემენტ ჯორჯიას“ მიერ გზშ-ის ჩატარების საჭიროების დადგენის მიზნით საქართველოს გარემოს დაცვისა და სოფლის მეურნეობის სამინისტროში წარმოდგენილია ქ. რუსთავში, შპს „ჰაიდელბერგცემენტ ჯორჯიას“ რუსთავის ცემენტის საწარმოს ექსპლუატაციის პირობების ცვლილების (N1 ღუმელის დემონტაჟის) პროექტის სკრინინგის განცხადება.

2009 წელს საქართველოს გარემოს დაცვისა და ბუნებრივი რესურსების სამინისტროს მიერ ქ. რუსთავში შპს „საქცემენტის“ ცემენტის წარმოებაზე გაცემულია №109 (29.12.2009) ეკოლოგიური ექსპერტიზის დასკვნა და გარემოზე ზემოქმედების ნებართვა. 2012 წელს სახელის ცვლილების გამო გარემოზე ზემოქმედების ნებართვა გაიცა შპს „ჰაიდელბერგცემენტ ჯორჯიაზე“. N109 (29.12.2009) ეკოლოგიური ექსპერტიზის დასკვნის საფუძველზე, „გარემოსდაცვითი შეფასების კოდექსის“ 48-ე მუხლის მე-4 ნაწილის შესაბამისად, საქართველოს გარემოს დაცვისა და სოფლის მეურნეობის მინისტრის 2018 წლის 15 აგვისტოს N 2-674 ბრძანებით გაიცა გარემოსდაცვითი გადაწყვეტილება (შპს „ჰაიდელბერგცემენტ ჯორჯიას“ ცემენტის წარმოებაზე). აღნიშნული გადაწყვეტილების თანახმად, რუსთავის ცემენტის ქარხანას გააჩნია 3 კლინკერის ღუმელი.

წარმოდგენილი დოკუმენტაციის მიხედვით, პროექტი ითვალისწინებს ქ. რუსთავში, მშენებლის ქუჩა N70ა-ში შპს „ჰაიდელბერგცემენტ ჯორჯიას“ საკუთრებაში არსებულ ცემენტის ქარხანაში (ს/კ 02.07.02.035) კლინკერის N1 მბრუნავი ღუმელის დემონტაჟს. აღნიშნული ღუმელის ზომაა 3.6x127.5 მ, ხოლო წარმადობა-24 ტ/სთ. საპროექტო ტერიტორიიდან უახლოესი საცხოვრებელი სახლი დაშორებულია 440 მ-ით.

სკრინინგის განცხადებით წარმოდგენილი დემონტაჟის პროექტის თანახმად, კლინკერის N1 მბრუნავი ღუმელის საძირკველი არის მონოლითური რკინა-ბეტონის. ნაგებობის საყრდენი წარმოადგენს მართკუთხა პროფილის რკინა-ბეტონის კონსტრუქციას. საყრდენები სხვადასხვა სიმაღლისაა, მასზე დამონტაჟებულია დახრილი მბრუნავი ღუმელი, რომელიც ამოგებულია ცეცხლგამძლე აგურით.

წარმოდგენილი დოკუმენტაციის თანახმად, დემონტაჟის სამუშაოების განხორციელება უნდა მოხდეს ზემოდან ქვემოთ სათანადო კომისიის დასწრებით. სამუშაოს დროს

გათვალისწინებული უნდა იყოს: სადემონტაჟო კონსტრუქციის დროებით გამაგრება, მუშების სათანადო ინსტრუქტაჟი და უზრუნველყოფა სპეციალური ქამრებითა და სათვალეებით; დემონტაჟის შედეგად მიღებული კონსტრუქციების დროებით დასაწყობების ადგილი; ავარიული სიტუაციის შემთხვევაში უნდა მოხდეს სამუშაოების შეჩერება და სადემონტაჟო კონსტრუქციის გამაგრება; ყველა საფრთხის შემცველი ადგილი უნდა იყოს შემოღობილი და სათანადოდ განათებული; სამშენებლო ნარჩენი გატანილი უნდა იქნეს დროულად.

ანაკრები კონსტრუქციების დემონტაჟის დროს გათვალისწინებული უნდა იყოს შემდეგი საკითხები: სადემონტაჟო ლითონის კიბეების დაყენება მუშებისთვის/კონსტრუქციების მიმაგრების ადგილთან; ანაკრებ კონსტრუქციებს შორის ნაკერების და კვანძების გახსნა დროებითი გამაგრების გათვალისწინებით; ანაკრები კონსტრუქციების სამონტაჟო ყულფების შემოწმება და საჭიროების შემთხვევაში ახალის მოწყობა; დემონტაჟის შედეგად მიღებული კონსტრუქციების განლაგება შპს „ჰაიდელბერგცემენტ ჯორჯია“ სპეციალურად მოწყობილ ღია მოედანზე; ტრავერსების გამოყენება და მათი პარამეტრების გათვალისწინება ამწის შერჩევის დროს; მონოლითური რკინაბეტონის ნაწილების დაშლა ჩაქურებით.

დემონტაჟის დროს გამოყენებული იქნება მანქანა მექანიზმები: 2 ცალი სამშენებლო ლითონის კიბე ბაქნით; მიმღები ნაგვის ბუნკერი; საკომპრესორო დანადგარი; 2 ცალი სანგრევი ჩაქურჩი; 4 ცალი ნიჩაბი; 2 ცალი ელექტროსახერხი; 4 ცალი სპექტრანსპორტი; 2 ცალი შემდღებელი აპარატი და მუხლუხასავალიანი ამწე.

სადემონტაჟო სამუშაოები განხორციელდება შემდეგი თანმიმდევრობით: მოსამზადებელი პერიოდის სამუშაოების ჩატარება; მბრუნავი ღუმელის დემონტაჟი; გრუნტის დამუშავება ხელით; საძირკვლის ამოღება; სამშენებლო ნარჩენის გატანა; სხვადასხვა სამუშაოები.

წარმოდგენილი დოკუმენტაციის მიხედვით, ყველა სამუშაოს განხორციელება მოხდება საქართველოს მთავრობის 2007 წლის 28 მარტის N62 დადგენილების „მშენებლობის უსაფრთხოების წესების“ მოთხოვნათა გათვალისწინებით. სამუშაოების მოცულობიდან გამომდინარე დემონტაჟისთვის პირობითად გათვალისწინებულია 6 თვე.

დაგეგმილი საქმიანობის შედეგად წარმოიქმნება არასახიფათო, სამშენებლო ნარჩენები (ცეცხლგამძლე აგურები), რომელთა მართვაც მოხდება ნარჩენების მართვის კოდექსის შესაბამისად. მოხდება წარმოქმნილი რკინის კონსტრუქციების დაჭრა, მათი დროებითი დასაწყობება საწარმოს ტერიტორიაზე და შემდგომ რეალიზაცია.

სკრინინგის განცხადების თანახმად, სამინისტროსთან შეთანხმებული გარემოსდაცვითი მონიტორინგის გეგმის მიხედვით, შპს „ჰაიდელბერგცემენტ ჯორჯია“ მუდმივად აწარმოებს ხმაურის მონიტორინგს, ხოლო პერსონალი აღჭურვილია ინდივიდუალური დაცვის საშუალებებით.

კლინკერის N1 მბრუნავი ღუმელის დემონტაჟის შემდგომ აღარ მოხდება აღნიშნული ღუმელიდან ატმოსფერულ ჰერში მავნე ნივთიერებების გაფრქვევა. დემონტაჟის შედეგად

გაუქმდება მნიშვნელოვანი გაფრქვევის წყარო, რითაც გაუმჯობესდება გარემოს მდგომარეობა.

დემონტაჟის პროცესი დაგეგმილია არსებული საწარმოს ტერიტორიაზე, სადაც მოედანი მობეტონებულია და ნიადაგის ნაყოფიერი ფენა არ არსებობს. შესაბამისად ნიადაგის ნაყოფიერ ფენაზე რაიმე ზემოქმედება მოსალოდნელი არ არის.

„გარემოსდაცვითი შეფასების კოდექსის“ მე-7 მუხლის მე-5 ნაწილის შესაბამისად, სკრინინგის განცხადება განთავსდა სამინისტროს ოფიციალურ ვებგვერდზე და ქ. რუსთავის მუნიციპალიტეტის საინფორმაციო დაფაზე. საზოგადოების მხრიდან აღნიშნულ საქმიანობასთან დაკავშირებით შენიშვნები და მოსაზრებები არ წარმოდგენილა.

ყოველივე ზემოაღნიშნულიდან გამომდინარე კლინკერის N1 მბრუნავი ღუმელის დემონტაჟი არ გამოიწვევს გარემოზე მნიშვნელოვან ზემოქმედებას.

ზემოაღნიშნული კრიტერიუმების გათვალისწინებით, „გარემოსდაცვითი შეფასების კოდექსი“-ს მე-7 მუხლის მე-6 ნაწილისა და ამავე კოდექსის მე-5 მუხლის მე-12 ნაწილის საფუძველზე,

ვ ბ რ ძ ა ნ ე ბ:

1. მიღებულ იქნეს სკრინინგის გადაწყვეტილება, რომ ქ. რუსთავში, შპს „ჰაიდელბერგცემენტ ჯორჯიას“ რუსთავის ცემენტის საწარმოს ექსპლუატაციის პირობების ცვლილება (N1 ღუმელის დემონტაჟი) არ დაექვემდებაროს გარემოზე ზემოქმედების შეფასებას;
2. შპს „ჰაიდელბერგცემენტ ჯორჯია“ ვალდებულია საქმიანობა განახორციელოს 2018 წლის 15 აგვისტოს გაცემული (ბრძანება N 2-674) გარემოსდაცვითი გადაწყვეტილებით განსაზღვრული პირობების შესაბამისად (ეკოლოგიური ექსპერტიზის დასკვნა N109, 29.12.2009), წარმოდგენილი ცვლილებების გათვალისწინებით;
3. შპს „ჰაიდელბერგცემენტ ჯორჯიამ“ ექსპლუატაციის პირობების ცვლილებამდე უზრუნველყოს განახლებული „ატმოსფერულ ჰაერში მავნე ნივთიერებათა ზღვრულად დასაშვები გაფრქვევის ნორმების პროექტის“ სამინისტროსთან შეთანხმება (ექსპლუატაციის პირობების ცვლილების გათვალისწინებით);
4. შპს „ჰაიდელბერგცემენტ ჯორჯიამ“ ექსპლუატაციის პირობების ცვლილებამდე უზრუნველყოს განახლებული ნარჩენების მართვის გეგმის სამინისტროსთან შეთანხმება ექსპლუატაციის პირობების ცვლილების გათვალისწინებით;
5. ზემოაღნიშნული პირობები წარმოადგენს 2018 წლის 15 აგვისტოს (ბრძანება N 2-674) გარემოსდაცვითი გადაწყვეტილების (ეკოლოგიური ექსპერტიზის დასკვნა N109, 29.12.2009) პირობების განუყოფელ ნაწილს და მათი შესრულება სავალდებულოა;
6. ბრძანება დაუყოვნებლივ გაეგზავნოს შპს „ჰაიდელბერგცემენტ ჯორჯიას“;

7. ბრძანება ძალაში შევიდეს შპს „ჰაიდელბერგცემენტ ჯორჯიას“ მიერ ამ ბრძანების გაცნობისთანავე;
8. სკრინინგის გადაწყვეტილების გაცემიდან 5 დღის ვადაში გადაწყვეტილება განთავსდეს სამინისტროს ოფიციალურ ვებგვერდზე და რუსთავის მუნიციპალიტეტის აღმასრულებელი ან/და წარმომადგენლობითი ორგანოების საინფორმაციო დაფებზე;
9. ბრძანება შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დ. აღმაშენებლის ხეივანი, მე-12 კმ. N6) მხარის მიერ მისი ოფიციალური წესით გაცნობის დღიდან ერთი თვის ვადაში.

გიორგი ხანიშვილი

მინისტრის მოვალეობის შემსრულებელი

